



## PORTAVÓS VI GOVERN U KONSTITUSIONÁL



## KOMUNIKADU BA MEDIA

Loron 19 fulan-marsu tinan 2015  
Dili, Timor-Leste

### Primeiru-Ministru alta ona hosi ospital

Primeiru-Ministru, Dr. Rui Maria de Araújo, alta ona hosi *National University Hospital* Singapura nian horseik no daudaun ne'e hela iha otél ida iha Singapura to'o nia fila fali mai Díli iha sábado. Primeiru-Ministru rekupera ona nia saúde no sei halo hikas fali konsulta dala ikus nian iha loron sesta molok fila mai.

Ohin dader, Primeiru-Ministru hasoru-malu iha sorumutuk kortezia nian ida ho Ministru Negósius Estranjeirus Singapura nian, K. Shanmugam, atu agradese ba ospitalidade no tulun ne'ebé nia hetan durante hala'o tratamentu no atu hato'o mós Timor-Leste nia solidariedade no preokupasaun ba kondisaun saúde Primeiru-Ministru dahuluk Singapura nian, Lee Kuan Yew.

Durante nia baixa iha *National University Hospital* Singapura nian, Primeiru-Ministru nu'udar médiku ida, nia hasoru-malu ho ekipa jestaun ospital nian hodi aprende tan kona-ba oinsá setór saúde funsiona iha Singapura no oinsá iha facilidade ba ninia populasaun sira. Timor-Leste no *National University Hospital* Singapura nian hala'o ona servisu hamutuk iha área saúde nian hosi tinan rua ikus no durante sorumutuk, Primeiru-Ministru diskute kona-ba possibilidade atu iha kooperasaun ho Timor-Leste iha tempu oin-mai.

Nia agradese mós ekipa ospital nian ne'ebé iha atensaun hodi fó assisténsia ba nia.

Primeiru-Ministru mós vizita pasiente timoroan ida ne'ebé daudaun ne'e hetan tratamentu iha ospital ne'ebá.

Portavós Governu Konstitusionál Da-neen nian, Ministru Estadu, Ágio Pereira, fó-sai katak, Governu no povu Timor-Leste nian sei haksolok tebe-tebes atu ita nia Primeiru-Ministru fila-hikas mai uma iha sábado". Nia agradese ba ema hotu ne'ebé assiste nia durante semana liubá inklui médiku no funsionáriu sira Ospital Nasionál Guido Valadares nian iha Timor-Leste no ekipa médiku iha *National University Hospital* Singapura no Funsionáriu sira Embaixada Timor-Leste nian iha Singapura".



Ágio Pereira

+670 7723 0011

[agio.pereira@cdm.gov.tl](mailto:agio.pereira@cdm.gov.tl)

[govtlmedia@gmail.com](mailto:govtlmedia@gmail.com)

[www.timor-leste.gov.tl](http://www.timor-leste.gov.tl)